

Keuntungan Petronas bukan syarat subsidi kerajaan untuk rakyat: PM

PORT DICKSON: Kerajaan tidak boleh selama-lamanya memberikan subsidi berikutan keuntungan yang diperoleh oleh syarikat seperti Petronas, harus disalurkan untuk pembangunan dan kepentingan rakyat, kata Datuk Seri Abdullah Ahmad Badawi.

Perdana Menteri berkata, banyak pihak terkejut jumlah yang besar disalurkan kerajaan untuk memberikan subsidi kepada rakyat.

"Sekarang harga minyak naik... lama mana kita boleh bagi subsidi minyak, takkan satu hari nanti Petronas dapat duit dan semuanya digunakan untuk bagi subsidi, di mana duit nak belanja untuk pembangunan sebab semua jadi subsidi.

"Tentu tak boleh... ini bukan ca-

ranya nak urus kewangan dan perolehan kita," katanya berucap melancarkan Program Rapat Bestari Peringkat Kebangsaan anjuran Kementerian Penerangan di Dataran Seri Kemang, dekat sini, semalam.

Hadir sama, Menteri Besar, Datuk Seri Mohamad Hasan dan Menteri Penerangan, Datuk Zainuddin Maidin,

Bagi menyiapkan negara, Abdullah berkata, kerajaan memberi tumpuan pembangunan modal insan supaya ciptaan baru yang dapat mengurangkari kos kehidupan dapat dihasilkan rakyat negara ini.

Perdana Menteri berkata, semua pihak bertanggungjawab menjayakan Misi Nasional dan memastikan negara mencapai pembangu-

nan dan kemajuan seperti diharapkan.

Pada masa sama, Abdullah mengingatkan semua pihak supaya tidak cuba membangkitkan isu sensitif berkaitah kaum dan agama.

"Jangan gaduh dan ungkit pasal hal kaum dan agama... jangan dakwah orang Islam supaya peluk agama lain, begitu juga kebebasan orang lain untuk terus berpegang pada agama dia, itu kebebasan dia.

"Banyak perkara sudah ditetapkan dalam Perlembagaan dan kekal... jangan diusik, nanti akan timbul masalah. Sama-samalah kita berhati-hati dalam perkara ini, biar kita hidup bertolak ansur," katanya.

Sementara itu, ketika berucap pada majlis jamuan negeri di Hotel

Royal Adelphi, di Seremban malam tadi, Abdullah memberi jaminan kerajaan tidak akan meminggirkan mana-mana pihak daripada menikmati manfaat segala pembangunan yang dirancang.

Memberi contoh Negeri Sembilan dan Melaka yang tidak disenaraikan sebagai koridor pembangunan baru dalam Rancangan Malaysia Kesembilan (RMK-9), Perdana Menteri, berkata kedua-dua negeri itu akan tetap mendapat manfaat.

"Limpahan pembangunan Lembah Klang yang kian padat akan mengalir ke Negeri Sembilan seperti pembangunan pusat bioteknologi di Nilai serta berkaitan pelancongan di Port Dickson, malah ia boleh mengalir sehingga Melaka," katanya.